



國家清史編纂委員會・文獻叢刊

清代詩文集彙編

國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 三七六

抱山堂集十八卷 朱 彭 撰

一

恒一堂文稿三卷煙霞錄一卷山居野吟一卷江村野吟一卷 蘇寧阿 撰

一四七

知足齋詩集二十卷知足齋詩續集四卷知足齋文集六卷知足齋

進呈文藁二卷附年譜三卷 朱 珪 撰

二八三

抱山堂集

辛酉重刊

朱徵士傳

儀徵阮元撰

徵士名彭字亦錢號青湖浙江錢唐人也即以詩稱於時由是益自喜以詞賦補弟子員既而書試無所遇乃縱游金陵泛江登金焦兩山拜吳季子之墓而返自是詩益道宕不肖屑屑世故倘伴於西湖山水間者三十年余在京師時即知名及視學兩浙見徵士與之譚名物掌故皆能有所得及丙辰

朝廷徵天下孝廉方正之士郡縣以名聞而徵士

傳

因年老固辭不就人益以此高之家素貧居恒著書不輟徵文攷獻爲武林談藪南宋古蹟攷皆燬於火乃益刻勵爲吳越古蹟攷南渡寓賢錄書畫所見集抱山堂集如千卷藏於家夫杭自厲樊榭杭堇浦陳句山諸先生詠歌之後詩不振者數十年而徵士以雅潤清麗之旨繼軌往哲至今杭人之言詩者多以朱氏爲歸然則天之所爲塞其遇者昌其文歟嘉慶八年余入

覲歸徵士已於八月四日卒年七十有三子二長械次壬壬爲余詒經精舍之士因稽顙求爲傳余

以舊史官之職遂不辭舉其大略書之俾弗濫焉

傳

二

抱山堂集自序

余方成童卽耽吟詠偶檢敝篋得唐人集輒手一編不忍釋久之觸於景感於心往往得句俟暇足成之然猶不令人知也一日家鹿田先生過塾與莫柳亭師談詩竟夕謂少年學文宜兼習聲律於是出所作就正得邀獎許然後敢肆力於詩今忽五十餘年矣日月易逝童已成翁猶幸生逢

盛世得以徜徉湖山杖藜行歌陶寫幽抱譬之鳴鳥當春和風鼓盪而不自知其聲之長也游覽所及篇什漸多探囊發篋尙存二千餘首壬寅冬鄰

抱山堂集自序

一

人不戒于火強半被焚竊以生平精力所萃未忍捐棄復拾燼餘編次成帙回憶里中諸耆舊皆墓木已拱末由研覈去取何敢遽出問世今春適當初度吾友仇一鷗商之門下士咸思釀錢刊詩以爲壽不得已遂從其請吁余敢自詡爲能詩乎哉少不學道白首無聞徒沈湎于詞章末技爲壯夫所不爲余滋愧焉茲之勉從所請者重諸生之愛我且聊以謝一鷗云爾庚戌年春三月上巳後十日青湖朱彭書於成趣軒

湖山遺事詩序

余與徵君年相若也居相近也憶自成童同遊家柳亭先生門七十餘年來分袂日少把臂日多晨夕過從時凡吟成一首編成一冊輒與共讀時則抃舞時則唏噓心相印也所著等身書余最愛其南宋古蹟一編蒐羅富寄托深殫心是書者幾半生矣每語君必錄副本以備不虞余蓋有所懲也君曰吾書已垂成吾將手寫定本付傳抄耳不意丙辰之冬游光爲虐倏焉攫去詩集幸久雕得覓印本重鈐而古蹟考無從再輯矣湖山遺事詩乃

抱山堂續集序

一

丙辰以後偶有記憶時閒弄筆墨也憶徵君人琴俱往墨痕猶新子_械編成二卷并遺詩一卷擬附抱山堂集後余披尋再四宛若齋頭把卷推敲字句時也嘉慶九年新元甲子首夏莫維謹識

抱山堂集目錄

卷一

研北集

古今體詩六十八首

卷二

貯瓢集

古今體詩五十一首

卷三

秣陵集

古今體詩六十五首

卷四

澄江集

古今體詩六十五首

卷五

毘陵集

古今體詩五十二首

抱山堂集目錄

一

卷六

倦游集

古今體詩六十一首

卷七

束筍集

古今體詩六十首

卷八

古籐館集

古今體詩五十九首

卷九

小玲瓏館集

古今體詩五十八首

卷十

園居集

古今體詩六十九首

卷十一

園居續集

古今體詩五十七首

卷十二

蔭綠亭集

古今體詩五十二首

卷十三

鐵崖結鄰集

古今體詩五十八首

卷十四

鐵崖結鄰集

古今體詩六十五首

卷十五

抱山堂集目錄

二

湖船簫譜詞

長短調共四十九首

卷十六

抱山堂續集

古今體詩三十九首

卷十七

湖山遺事詩

七言絕句四十五首

卷十八

湖山遺事詩

七言絕句五十五首

抱山堂集卷一

研北集

錢塘 朱彭 青湖

春曉

暄和到草楊一臥如飲醇窗間人未起百鳥喧
春眷茲晨光動披衣向前軒微雨夜初歇新綠浮
城闌乃知韶華好物象俱含欣余亦懷生意陶然
全我眞

採蓮曲

朝來鼓蘭槳花氣盈羅裾薄言採相贈愛他香滿
渠採花恐傷藕折莖易傷手傷手儂不惜傷藕花

抱山堂集卷一

一

不久迢迢河之梁兩兩飛鴛鴦只見浦中妾不見
岸上郎郎來倘不早妾顏豈常好的的紅芙蓉西
風忽吹老

七夕詞

烏鵲過停金梭思之子望銀河銀河湜湜搖晴雪
半規月上遙山缺天邊牛女遠相望不獨人間眷
離別吳姬妝成倚綺樓水晶簾捲寒光浮綵縷將
穿月半落花陰漠漠凝雙眸月影花陰相度處漸
覺熹微天欲曙天欲曙黃姑去淚沈瀾灑秋雨

春日湖上醉歌卽送李能白歸武原

李君浪遊何草草前年躍馬飛狐道戰壘荒煙弔
晉唐風雲颯爽生懷抱歸來訪我湖西頭捉臂一
笑同登舟朱孃碧香杯瀉油玉簫金管喧中流是
時桃柳春如織鈿車寶馬驕寒食十二橋欄宛轉
紅雙堤夾鏡光初拭故鄉如此不早歸空使風塵
污顏色對景終須罄夙歡當歌且自扞胸臆眼前
富貴隨所遭奔走頻年徒役役顛風倏忽吹船開
湖面湧出琉璃堆殘霞散樹夕陽亂彩翠迴合山
光來依然欲別各回首送君還折蘇堤柳人生會
台原不常別後相思復何有不如拚盡罇中酒

題唐明皇鬪雞圖

旭日射堂人影動丹青黯澹煙光重高叉一燈鬪
雞圖矯首相看便驚竦衣冠約略皆唐裝人物意
態分毫芒賈昌率童抱雞至花冠上指神揚揚引
開草色排春場明皇勒馬駐不發左右環觀顏色
悅灑將芥粉颯霜毛薰得狸膏森戰骨低昂怒目
光不定金距盤拏各馳突一雞兀立峙上風不虞
失勢遭顛蹶一雞佯俯旋聳身意欲中人在倉卒
由來狡獪豈自雄外假蠢懦藏其鋒祿山雌伏定
颺去敗奚請斬王應從優容翻使全羽翼騎驟西

抱山堂集卷一

二

狩傷飄蓬上皇白髮歸來晚空教蜀道驅長坂
鼓喧聲動地來綺羅香影隨煙散爲問雞坊尙有
無曲江宮殿長青蒲外作禽荒古有戒令我觀圖
增嘆呼

冬至後過萬峯菴歸東讓公

湖風扇微暄春信動殘臍早梅藥半舒作意媚禪
榻茶話得參寥拈花妙酬荅別去首重回綏尋歸
路踏林間逗龕燈荆扉猶未闔彷彿入定時疎影
上寒衲

西馬塍雜詠四首

抱山堂集卷一

三

姜白石墓

寄跡石橋畔瘞骨花塍西欲酌一瓢酒草色迷幽
蹊空餘清麗詞堪與秦黃齊

宋伯仁寓居

一水自彎環蓬門通小艇閒吟寓公詩澹泞波光
冷至今蘋花香猶作茗川景

勾曲外史菴閣

岩巖築傑閣瀾漫臨澄灘凭欄仰喬松落花生高
寒伊人竟遐棄騎鶴茅山壇

張秦亭從野堂

張髯工五言古硬杜陵派種樹從野堂密葉清風
灑三徑忽難尋荒墟動遙喟

堂前有松徑槐徑蘆徑秦亭集有三徑詩

題人隱居

幽居深谷裏杳杳隔煙村孤鶴一長唳閒雲自到
門垂竿秋澗曲讀易古槐根盡日無人跡苔堦雨
氣昏

寄懷吳淨江自楚中之黔

泝盡瀟湘竹箭流跨鞍遙向貴陽遊林間旭日生
山下洞口飛雲落馬頭迢遞關河仍遠道飄零書
劍又深秋蠻鄉莫說風霜少早晚還須擁敝裘

抱山堂集卷一

四

洪忠宣公祠

兩宮北狩痛蒙塵奉使寧憐萬里身玉輦風沙勞
遠夢冷山冰雪老孤臣蘇卿返國聲名重屈子遭
讒怨恨新瘴海茫茫終謫去遙思麟閣是何人

歲暮登大觀臺

積氣浮山郭蒼茫獨倚欄歲窮催景短雲重壓江
寒酒幔林邊少人家雪後殘

時大雪壞屋甚多

含愁數歸

鳥何處一枝安

雪中懷南屏讓上人

楞嚴一卷共誰論曉起圍爐宿火溫雪擁萬峯無

客到老梅斜壓竹籬門

山窗開處失嵐光衲重天寒覺日長臨罷摩崖成
半偈蘆簾風颭煮茶香

懷冒甚原客桐廬

春樹暗江潯桐江江水深山川高尙地猿鳥別離
心解纜及明月臨流寫素琴謝公遊眺處想見獨
憑襟

借金江聲先生丁誠叔吳淨江集讓上人契

原草堂食燒筍

正及齋鐘午招邀入道場盃供雲子潔盤進竹萌

抱山堂集卷一

五

香餽客逾兼味叅禪得共嘗他時修筍譜莫忘契
原堂

題仇十洲宮人感秋圖

井梧搖落上陽愁一夜西風水閣頭宮女不將黃
葉掃爲憐團扇亦逢秋

春閨送別

紅板橋頭鶯亂啼江南客路草萋萋別郎欲遣飛
花送無那東風只向西

寄冒甚原

寄跡句章地淹留總越州聞濤鄉國遠臥病海城

秋寥落誰青眼艱難易白頭書來知客况努力辦歸舟

鶴膝竹杖歌

城東一老身龍鍾示我手中八尺筇堅削彷彿瘦脛立礪礪凸節形模工扶行恍作步斗態擬以鶴膝毋乃同仙禽昂藏無窘步嘉籥葱鬱經窮冬傳聞此竹產蠻島命名已足娛衰翁我思蠻島中幽崖霰霜雪但見箐煙昏不見日光潔俯瞰簸朶波濤之洶湧仰駭象鼻巒嶺之蟻岬蛇徑蟻附總難上誰採簣管濟顛跌乃有羅鬼矧老諸猥猥一寸

抱山堂集卷一

不

腳皮堅鑄鐵騰踏峯尖峯欲裂皮袋袋刀髹帶結拔出一揮幾枝折苗娘肩之市上來有客攜歸作杖材石徑把節不懼滑一任細雨沾蒼苔利用應笑雞頸軟合制何必鳩頭堆海內詩老好遊覽得此便可輕崔嵬何時船向沅江開截取千本颺帆回寶其一兮相追陪西窮廬阜東徂徠

借趙笠亭吳山酒樓觀潮

吳山樓閣倚青霄如練澄江入望遙沙岸亂帆爭晚渡海門晴雪上秋潮波瀾陡向高懷瀉壘塊全憑濁酒澆白馬紅旗談往事狂歌不用楚詞招

冬月

搖漾不成暈霜風吹月寒光隨雲氣歛景逼歲華殘有客偏無寐披裘獨倚欄卻憐冬夜裏可耐幾回看

早春山行

一徑入春陰行行野趣深早煙浮遠浦殘雪秀疎林問客少塵事看山生隱心何當結茆屋長此寄清吟

飲畱餘山莊次歸愚先生原韻

樹杪朱欄接遠岡畚緣曲逕到山莊行聽石壁流

抱山堂集卷一

七

淙落坐捲風簾小閣涼對酒何妨誇大戶有池亦可號高陽舫船屢泛渾忘返憑眺江光夕照黃

讓上人南屏山舫落成同人分賦

新闢禪居祇數椽恍疑舟艤翠屏邊湖光塢影看長在竹浪松濤坐渺然世外久拋雙槩險定中時載一蒲圓笑他船子蘆灣泊未解巖棲結靜緣

趙松雪相馬圖

張公藐視四十萬匹馬眼空方識權奇者紛紛俗子尙皮相遂使凡材盈冀野頰也下筆存其真精爽內蘊骨肉勻四蹄矯健輕風塵兀立紙上如有

神紅袍長官負高識整鞍爲繫長林側彼此俱憐
知遇奇居然顧盼生顏色只今龍媒亦間生趨起
恥與駑駘行憑誰拂拭寒郊外一向秋風昂首鳴
過張氏朱草山房悼雙桂作

雲居山下林麓荒前明張氏遺山房傳聞此地表
靈瑞丹芝曾茁空階傍其間八桂宋元植鐵幹擎
雲有餘力秋風一夜從西來滂沱古香吹不息山
房傾圯陳迹遷喬木摧拉淪桑田由來造化妬神
物惟餘兩樹當其偏一則盤根踞地出夜叉仰臥
撐老拳一則童童支翠蓋日色不漏陰風旋我生

抱山堂集卷一

木

性僻頗好古每來摩撫斜陽前興亡閱盡飽霜雪
要卜雙桂垂千年樵童剝膚蟻穿穴戕賊那得全
其天春來枝幹盡零落朽質但有藤蘿纏近遭雷
擊土人鋸空庭一望惟寒煙君不見東家檜南陽
柏名敵奇材幾千百託根得地堅如石爾獨胡爲
竟羅厄荒園重過空蕭槭

謝彬鍾堄嫁妹圖

畫人欲行獸欲走謝老吾鄉得名久何時縱筆寫
荒幻橫幅淋漓羅鬼醜蒼茫落日山光昏山神導
前跌駭奔於菟妥尾不敢蹲持者擔者行接跟鬼

僅力怯艱舉重以首承之同戴盆穿深林兮徑繞
繞搗鼓吹簫出煙嶠鍾家小妹坐羊車半揭珠帷
善窈窕也類唐策蹇驢欹似乘船鞭影掉在昔
李龍眠畫作嫁妹圖十洲及叔寶異代工臨摹此
圖匠心更獨出差與古本同規模想當下筆氣概
麤方良膽裂魃蜮呼老屋動搖白晝暝風雨颯沓
煙模糊乃能一一雕鏤造化窮虛無不然安得紙
上羣靈趨

瑞石洞雜詠三十八首

近市卽仙源莫問仙何處世外欲尋眞還從此中

抱山堂集卷一

九

去尋眞路

古池抱山坳水色清且瀏種得玉井蓮中有如船

藕白蓮池

採藥歷名區歸讀桐君錄春雨忽攜鋤栽向山之
曲栽藥園

霜寒水色澄池面明于鏡一瓢沁心脾能令塵想
淨滌凡池

巖下芝方茁仙翁到處探呼童擔竹杖花草滿筠
籃採芝巖

泉從石脈生小池僅如盎策策游素儵便作濠上

想瑞石池

石罅本無泉俄驚溼枯樹獨坐聽潺湲前山夜來雨

空際颺天衣飄然何所依晚來風漸緊都向洞門飛

孤南老人星亭亭立巖岫只解看歸雲所以靜者壽

匿采岩壑間爲盤幸未琢終年繡苔衣惟期守吾璞

生公石點頭守素樹成道木石本無知感悟俱杳渺

微風韻虛谷颯沓成天籟恍聞子晉笙吹來煙月外

適意在山林屏跡無近遠茲巖亦隱仙何必金庭館

本是神龍宅何須杖化龍傳聞深窅處長有白雲封

仙眷棲空山秋來山氣冷石上補道衣斜陽照孤影

濤聲送清響雲影圍孤亭栽得雙松古元關不用

局松關

巋危肉峯起隆然一橐駝此身虛負戴終古臥青莎

昔在清虛府曾依丹桂枝縱遭天上謫還戀月波池

孤月映池波清池涵月魄水月兩不分幻作空明色

屹然石狻猊空憐守丹老何不乞餘藥去嚙青瑤草

丹砂九轉成岩間遺石竈此中有薪傳還須契眞誥

行行倚筇竹迤邐沿山腰何必天台去看余渡石橋

獨向洞邊行飄然仙骨輕遙聞松籟發散作步虛聲

拳石象三能卽三名尊亦相假欲商位置區合在斗杓下

千竿紫簣簪檀欒石上茂一誦雁門詩清風蕩襟袖

奇峯影倒垂翳然雲一朵冉冉只在山不向紅塵

抱山堂集卷一

十

抱山堂集卷一

士

墮垂雲峯

懸崖立洞口掩映霞光明孫綽如裁賦居然小赤城丹崖

石上莓苔長剛逢秋雨餘我來思面壁蒼翠溼衣裾翠壁

閒從洞頂望澹泞早秋天笑指片雲起隨風散碧煙碧雲天

昂首奮鱗鬣不羨游江湖世上垂竿手鼉峯釣得無鼉峯

閒看翡翠岩時來翡翠鳥岩前啼一聲飛上松林

妙翡翠巖

抱山堂集卷一

圭

雲去岫嶙峋雲來岫明滅來去本無心幽人自怡悅白雲岫

煙嵐拔地起亭際望冥冥一朵芙蓉石中含嶽色青芙蓉

練心歸太清草藉華陽服四山嵐影浮鬚眉染寒綠坐忘岩

曲徑多盤紆奇石相迴互月夜寂無人來踏朝元路朝元路

南山有象鼻茲石具全相何時披羽衣岩龕踞其

上象石

雲林有奇峯茲石亦蒼秀評品記毛君城南小靈鷲飛來石毛稚黃先生遊記呼爲城南靈鷲

扼險層巒上關門霄漢通猶傳騎鶴者于此御長風透天關

抱山堂集卷一

圭

抱山堂集卷一

抱山堂集卷二

貯瓢集

錢塘 朱彭 青湖

走索行

一夫導前鳴銅鉦有婦結束肩隨行三义路口喚
戲索兒童拍手歡相迎好事圍場飲錢急堵牆觀
者羣爭集衆中側出掠雲鬟勢欲騰空翻却立回
眸躍上神力超兩傍齊駭聲喧囂娉婷意態獨整
暇垂楊閒擺風中腰高步堂堂一徑拓此時眼底
如無索往來絡繹驚颺馳失勢一蹶力不支翻身
倒垂猿挂樹半寸脚尖鈎索住旋空忽作轆轤轉

抱山堂集卷三

十

亂捲煙雲目爲眩人羨精能伎倆無我獨相看爲
嘆呼耕耘紡績棄不事輕身重利寧良圖答云尊
官莫嘲讓行乞由來非所尙江田米少征稅無衣
食翻懸一繩上頻年踏徧天涯路泣下吞聲難盡
訴譁然擁隊人競呼鳴鉦又向前村去

像

過鹿田先生觀樹堂題所藏楊升庵先生遺

誰遣詞臣遠戍邊披圖猶自慘風煙酖顏無復花
簪鬢曠世空瞻雪滿顛夢繞帝閭傷往事身羈洱
海迫衰年閨中虛有刀環約腸斷朝陽歲暮篇

前朝陳跡等浮漚遺像欣看一燈畱轉徙何時歸
水部翁謂鹿淒涼當日供僧樓嘉靖時有僧樓懸自
明報國心沈苑會自誰與招魂路阻修擬喚樊童
歌楚些金沙渺渺大荒秋

于忠肅公墓

墓門宰木颯英風山列三台氣象雄獨向朝中持
大計可憐身後見孤忠金縢議阻天威在城堡收
來羣盜空若定南遷艱返蹕諸臣那有奪門功

宋內教場

鳳凰山鎮古杭州閱武場開磴道畱奇石兩行排

抱山堂集卷三

二

仗立大江三折抱雲流戈鋌徒向宮中試帷幄誰
專閫外謀回首翠微亭畔路騎驢遺事劇堪愁
偕應叔雅過鐵冶嶺張園兼訪吳莊奇石用

東坡李氏園韻

城西多奧區名園委叢竹曾從耆舊游徧訪幽人
屋填壘餘額垣荒涼變陵谷應君嗜幽尋思豁清
秋日鐵崖一部婁亦附吳山族游跡余屢經前行
度詰曲疎林隱苗茨山村飄病綠老鐵此讀書孤
拳頤黃鵠于今名尙傳孰謂人代蹙一折入張園
清芬愜幽獨殘桂猶著花危樓惟剩水隔院正調

箏惜無酒盈斛斜陽界雲居山背陰霞畜下有泉
石莊池光帶飛鷺迎風蘿衣牽沿籬菊珠馥相將
玩奇石冥冥嵐煙撲翠疊玉芙蓉玲瓏插茵陸地
僻得秋寒楓老先霜禿想當經營初依岩成小築
淪棄等菱谿記文慚永叔怡雲庵復荒何處隨僧
粥國初改爲怡回瞻鐵嶺東人家雜歌哭兩園鞠
爲圃願得千緡贖滌蕩去餘穢嘉卉露高麓更掃
狐兔巢健兒載弧調自然位置佳不須牛曳轂奈
乏買山錢囊空但瑟縮明湖暮靄微遙天淨如沐
撫石共踟躕重遊應再卜樹杪見昏鴉日歸且相

抱山堂集卷二

三

逐

吳淨江招同莫柳亭夫子陳眉山先生讓上

人湖上看紅葉分得月字

霜林徧湖滑燦若春葩發結伴赴佳招橋頭一棹
撥倚舷眇素波秋光漾空闊蒼然南山橫積翠隨
意抹楓柏紛相映深淺界林樾微風搖冷紅飄蕭
侵鬢髮鬪酒傾金卮談禪罪玉屑流連罄夙歡夕
景翳將沒回首見寒煙落日淡于月

褚公祠

寵奪椒房武氏驕獨持顧命感同僚空教還笏投

荒微從此垂簾變北朝唐八日武后時爲北朝先帝恩深原
不負愛州魂遠有誰招千秋梓里存祠廟社鼓迎
神未寂寥

贈趙赤繡先生

入世抱遐尙無如夫子賢襟期秋水外標格晉人
前睡少因耽詠身閒或近禪聞先生近解禪型久諸官署
冷枯坐亦陶然

聽雪

入夜息羣籟虛堂欲二更孤燈沈短焰亂竹瀉寒
聲戶外人踪絕山中客夢清不眠支倦枕早覺紙

抱山堂集卷二

四

窗明

對雪

雁聲低欲墮急雪灑空林門掩疎籬靜人居古屋
深撥爐添宿火貰酒伴孤吟兀坐方岑寂鄰翁喜
獨尋

霽雪

同雲開曉日一望景全收元氣騰遙甸寒光湧滿
樓鵲驚喧樹杪冰解墮簾鈞何處騎驢客垂鞭過
隴頭

殘雪

雪滿湖西路相看已隔年春來消不盡掩映斷橋
邊茅屋背斜照山村接暝煙蕭閒饒畫意好情叔

明傳

王叔明有溪山殘雪圖

宋石經歌

定經刻石始蔡邕書尚隸體形模工沿至唐代乏
古筆俗書僅以偏師攻有宋草草創南渡江山半
壁難稱雄閒臨禊帖得楷法欲借經傳傳無窮摹
勒知在十三載光堯高閣凌蒼穹殘碑獨閱時代
久至今還列膠庠中赤繡先生雅好古問字時許
趨齋宮鏗然石韻出廊廡側耳傾聽疑絲桐誰將

抱山堂集卷二

五

松煤恣敲揚響答合有於論鐘久無龜趺臥砌下
但見笏立羅牆東易書詩禮半淪棄左偏片碣存
中庸歷數左氏四十八自矜所得亦已豐刻工精
妙愜嗜好頻措倦眼分纖濃憶昔白雁渡江左西
來楊璉僧兜紅新銜釋教都總統敢向諸路誇軍
功遺宮起建一瓶塢搜山採石勞磨礪昭陵玉匣
且不保石經那得埋寒叢長繩拽倒就輦載何異
獵碣窪爲春宋雖偏安重經訓典物自有神靈崇
一朝力持不全失天獨假手申屠公于今嵌壁尙
帖妥覆以瓴甌檐翬形我朝同文洽寰宇昌明

經學羣儒宗流傳監本得字樣庠序講習勤三冬
何須到此玩石刻摩挲往跡心先慵欲盤硬語曉
萬古愧無筆繼元和風

偕趙赤繡先生孤山探梅

汙汙汙綠波春氣溢湖面弭棹孤山隈勝游未云
晏香影颺風枝梅花竹外見青鞋破苔痕徑逐疎
籬轉坐石洽幽悰臨流寄遐眄緬懷放鶴人共掬
寒泉薦

早春偕東甫能白文水過徐文紫山黃雪山

房遺址流連久之渡湖訪南屏讓公不值

抱山堂集卷二

六

用能白原韻

冲晦幽居傍水村庭前老樹已無存小橋斜轉仍
通港舊客重來不識門梅放春山殘雪白鐘浮曉
寺亂煙昏停舟空指南屏路未得高僧對榻論

春日湖上

幾日東風暖韶光忽已深桃花爭曉色湖水識春
心青翰舟先放紅螺酒共斟羨他堤樹上幽鳥學
人吟

憶河渚舊游囑蟄夫作畫

春山欲化煙春浦雨綿綿雲氣圍梅塢香風引客

船溯洄猶入夢惘悵已經年乞取徐熙筆圖中結靜緣

題紫山先生遺詩後

垂老湖灣隱前朝樹表村白頭淹短榻黃雪擁閒門漁釣年光晚柴桑詩格尊他時推獨行珍重此編存

門外有宋時銀杏一株每當秋風葉落如積雪焉故名其居曰黃雪山房

雪飲圖爲東甫作

君家瀕河居繚垣多梅竹嚴冬風雪緊飛霰走破屋頻將白墮溫松火爨煜煜透釜菰羹香攢爐芋魁熟薄醪借熱攻得句抽虎僕我曾誦君詩清光

抱山堂集卷一

七

照眉目如何會合稀未得廁近局行將冒寒尋舉杯定相屬

文姬歸漢圖

家聲籍甚蔡中郎彈到胡笳淚萬行賴有阿瞞能念舊不教青塚伴王嬙

寄之

吳方舟約游湖上觀荷余以臥病不赴作此
菱荷香繞釣魚磯臥病虛君曉扣扉只好蕩舟秋月下澹煙荒港弔紅衣

晚涼偶成

連旬溽暑燒紅霞揮汗如雨人咨嗟今宵涼風起天末喜無熟客來人家兒童邀涼坐樹下彎彎月子歌嘔啞安得當年謝仁祖北窗企腳彈琵琶

夏日追暑湖上

幾折溪流繞翠屏恰從山缺縛茆亭白雲相對有閒意高臥亭前讀水經

湖灣一棹逐輕鷗涼雨瀟瀟忽打頭無數跳珠荷葉亂篷窗獨坐滿身秋

短籬曲岸野人家載得名泉是白沙一片濤聲來檻外瓦爐松火煮團茶

抱山堂集卷二

八

我愛蕭然竹院僧香南雪北了三乘任他觸熱人多少靜裏看來只似冰

觀退谷所藏魯孔孫竹冊

寫竹在神不在貌王綬夏昶皆入妙後來繼起魯孔孫雨葉風枝亦能肖流傳畫冊退谷珍雲煙供養時相親邀余古廳共把玩想見擲筆于青旻一幅便娟洗朝露細碎香生幽澗路一幅澹月籠春陰是耶非耶勞我心別有巖泉似三疊晴雷填填風獵獵好手畫竿不畫葉紙外蒼茫元氣接其餘幅幅無定形墨花浮出琅玕青恍然坐我韜光亭